



**PEKELILING AM KERAJAAN NEGERI JOHOR  
BILANGAN 2 TAHUN 2017**

**PELAKSANAAN ENAKMEN LAMBANG, GELARAN DAN ANUGERAH  
(MENCEGAH PENGGUNAAN TIDAK WAJAR) JOHOR 2017 SERTA  
PENGGUNAAN JATA KERAJAAN NEGERI JOHOR**

**1. TUJUAN**

Pekeliling ini bertujuan untuk memaklumkan kepada orang awam berkenaan dengan pelaksanaan Enakmen Lambang, Gelaran dan Anugerah (Mencegah Penggunaan Tidak Wajar) Johor 2017 serta penggunaan Jata Kerajaan Negeri Johor.

**2. TAFSIRAN**

**2.1** Bagi maksud pekeling ini –

“*anugerah*” ertinya apa-apa Darjah, Tanda Kemuliaan dan Kebesaran yang dikurniakan oleh Raja, yang ditetapkan dalam ruang (1) Jadual Kedua dalam Enakmen Lambang, Gelaran dan Anugerah (Mencegah Penggunaan Tidak Wajar) Johor 2017 atau yang disiarkan dalam *Warta* Kerajaan Johor ;

“*enakmen*” ertinya Enakmen Lambang, Gelaran dan Anugerah (Mencegah Penggunaan Tidak Wajar) Johor 2017 ;

“gelaran” ertinya apa-apa gelaran yang dikurniakan oleh Raja, yang ditetapkan dalam Bahagian II Jadual Pertama dalam Enakmen Lambang, Gelaran dan Anugerah (Mencegah Penggunaan Tidak Wajar) Johor 2017 atau yang disiarkan dalam *Warta* Kerajaan Negeri Johor ;

“lambang” ertinya apa-apa lambang, mohor, bendera Diraja, tanda kebesaran, jata atau gambaran yang ditetapkan dalam Bahagian I Jadual Pertama dalam Enakmen Lambang, Gelaran dan Anugerah (Mencegah Penggunaan Tidak Wajar) Johor 2017 atau yang disiarkan dalam *Warta* Kerajaan Negeri Johor.

### **3. LATAR BELAKANG**

- 3.1** Bagi menjunjung titah DYMM Sultan Ibrahim Ibni Almarhum Sultan Iskandar, Sultan Yang DiPertuan Bagi Negeri Dan Jajahan Takluk Johor Darul Ta’zim, satu undang-undang telah digubal bagi tujuan mencegah penggunaan tidak wajar berkenaan lambang yang ditetapkan, gelaran dan anugerah yang dikurniakan oleh DYMM Sultan Johor. Penggubalan Enakmen ini merupakan salah satu usaha Kerajaan Negeri bagi memartabatkan institusi DiRaja dan diharap dapat membanteras penyalahgunaan lambang, gelaran serta anugerah yang ada di Negeri Johor ini.
- 3.2** Enakmen Lambang, Gelaran dan Anugerah (Mencegah Penggunaan Tidak Wajar) Johor 2017 telah mendapat kelulusan Dewan Undangan Negeri Johor yang bersidang pada 9 Mac 2017. Seterusnya, Enakmen ini telah diwartakan dan berkuat kuasa pada 16 Mac 2017.

#### **4. PENGGUNAAN JATA KERAJAAN NEGERI JOHOR DAN LAIN-LAIN LAMBANG, GELARAN DAN ANUGERAH**

- 4.1** Segala bentuk penggunaan Jata Kerajaan Negeri Johor termasuk dalam segala pembuatan dan penjualan cenderamata serta pakaian, mempamer pada mana-mana bangunan, mencetak kepala surat, baju korporat, cenderamata korporat seperti pen, beg kertas, *lanyard*, *notepad* dan lain-lain yang berkaitan perlu mendapat kebenaran bertulis daripada Y.B. Setiausaha Kerajaan Johor kecuali kepada Jabatan Kerajaan Negeri seperti di **LAMPIRAN A**.
- 4.2** Pejabat Setiausaha Kerajaan Johor (Bahagian Khidmat Pengurusan) dipertanggungjawabkan untuk mengawalselia berkenaan dengan penggunaan Jata Kerajaan Negeri Johor.
- 4.3** Permohonan kebenaran bagi penggunaan Jata Kerajaan Negeri Johor yang dinyatakan dalam Jadual Pertama Enakmen ini hendaklah dikemukakan ke Pejabat Setiausaha Kerajaan Johor (Bahagian Khidmat Pengurusan) dengan menggunakan Borang Permohonan Penggunaan Jata Kerajaan Negeri Johor seperti di **LAMPIRAN B**.
- 4.4** Permohonan bagi mendapatkan kebenaran menggunakan Jata Kerajaan Negeri Johor hendaklah dibuat ke Pejabat Setiausaha Kerajaan Johor (Bahagian Khidmat Pengurusan) tidak kurang daripada dua(2) bulan sebelum cadangan tarikh penggunaan atau pemakaiannya.
- 4.5** Penggunaan Jata Kerajaan Negeri Johor adalah dibenarkan bagi program atau majlis rasmi kerajaan tetapi hanya setakat bagi tempoh program dan majlis rasmi tersebut berlangsung sahaja.
- 4.6** Lain-lain penggunaan berkenaan lambang, gelaran dan anugerah yang dinyatakan dalam Jadual Pertama dan Jadual Kedua selain daripada Jata Kerajaan Negeri Johor perlu mendapat kebenaran dari Jabatan DiRaja Johor.

- 4.7** Permohonan bagi mendapatkan kebenaran menggunakan lain-lain Lambang, Gelaran dan Anugerah ini hendaklah dibuat ke Jabatan DiRaja Johor tidak kurang daripada tiga(3) bulan sebelum cadangan tarikh penggunaan atau pemakaiannya.
- 4.8** Permohonan kebenaran bagi penggunaan lain-lain Lambang, Gelaran dan Anugerah yang dinyatakan dalam Jadual Pertama dan Jadual Kedua Enakmen ini hendaklah dikemukakan ke Jabatan DiRaja Johor dengan menggunakan Borang Permohonan Penggunaan Lambang, Gelaran dan Anugerah seperti di **LAMPIRAN C**.

## **5. TEMPOH ‘COOLING PERIOD’**

- 5.1** Bagi mengambil kira kesedaran orang awam berkenaan dengan pewujudan Enakmen ini, Kerajaan Negeri telah memutuskan untuk memberikan tempoh selama 60 hari sebagai satu tempoh ‘*cooling period*’ mulai daripada tarikh pekeliling ini berkuat kuasa.
- 5.2** Tempoh ‘*cooling period*’ ini adalah untuk memberi peluang kepada orang awam agar mengambil maklum dan bersedia untuk mematuhi segala peruntukan undang-undang yang terdapat dalam Enakmen ini, sebelum penguatkuasaan Enakmen ini dikuat kuasakan sepenuhnya apabila cukup tempoh 60 hari itu tamat.
- 5.3** Tindakan undang-undang boleh dikenakan kepada mana-mana orang yang melakukan kesalahan di bawah Enakmen ini selepas tempoh ‘*cooling period*’ ini tamat.

## **6. TARIKH KUAT KUASA**

Pekeliling Am ini berkuat kuasa mulai tarikh **2 MEI 2017**.

## 7. PERTANYAAN

Sebarang pertanyaan berkenaan Pekeliling Am ini boleh dirujuk terus kepada:

Pejabat Setiausaha Kerajaan Johor  
Bahagian Khidmat Pengurusan,  
Aras 1, Bangunan Dato' Jaffar Muhammad,  
Kota Iskandar,  
79503 Iskandar Puteri, Johor

No.Tel : 07-266 6070 / 07-266 6071

No.Fax: 07-290 9955 / 07-290 9022

**“BERKHIDMAT UNTUK NEGARA”**

A handwritten signature in black ink, consisting of a long horizontal stroke with a loop underneath and a small upward tick at the end.

**(DATO' HAJI AZMI BIN ROHANI)**

Setiausaha Kerajaan,  
Johor.

Tarikh : 27 April 2017